

## LAASUUDEE

### *Yā pínɡi pāme*

- <sup>1</sup> Laasuude Dauda né, Yerusalemu kína yān yè.  
<sup>2</sup> Ma laasuude ma bè:  
 Yā pā búgubugu,  
 yā pā búgubugu,  
 à pínɡi pāme.  
<sup>3</sup> Bó àren gbēntee è e anduna guu  
 nawēa kè èe keε a zī pínɡi guua?  
<sup>4</sup> Kpàenɔ è gēte, wurenɔ è su,  
 mɔde anduna ègɔ kuu gurɔ pínɡime.  
<sup>5</sup> Ɔfāntē è bɔ, è gē,  
 è wā à εara à gá guu kè è bɔn.  
<sup>6</sup> Īa è káka sɔɔmetε kpa,  
 è liara à su gu'igbāroo kpa,  
 ègɔ ligaligaa àgɔ gaa àgɔ suu.  
<sup>7</sup> Swa pínɡi í ègɔ kaa ísɔiaa guume,  
 mɔde ísɔiaa è paro,  
 í pìnɔ è εara wà su swaa pìnɔ miamε.  
<sup>8</sup> Pó pínɡi è ní kpasa,  
 kpasa pì yā gè onala.  
 Gugwana è mɔ wéεaro,  
 yāmana è swā paro.  
<sup>9</sup> Yā kè kuu yāa bé eé εara àgɔ kuu dɔ,  
 yā kè wà kè yāan weé εara wà ke dɔ.  
 À dufu kee kú anduna guuro.  
<sup>10</sup> Pókee kuu ke weé be:  
 Nè pò dufu ke gwaó?  
 Auo! À gĩake à kuu wa ā zaa zi kò.

11 Gbē káakunɔ yā èg̃ɔ dɔ gbēken dɔro.  
Baa gbē kè aṣéḡɔ kuu ziaaɔ,  
aṣ yā é dɔ gbēken ziakpɛɛ zīro.

12 Ma laasuude ma kí blè Isarailinɔa  
Yerusalɛmu.

13 Ma mè kpà yā kè wèe kɛɛ anduna guu pínɡi  
tàasikɛnaa, má gwàgwa ɔ̀ndɔ'ɔ̀ndɔ má è Luda zī pásí  
dà gbēnteenɛ aṣ kɛ.

14 Ma yā kè wèe kɛɛ anduna guu è pínɡi, à pínɡi né  
pāme, pɛna gukoriamɛ.

15 Pó kotina porona vīro,  
wè e wà pó kè kuuroo naroro.

16 Ben má ò ma nòsɛ guu ma bè: Ñ gwa! Ma ɔ̀ndɔɔ  
bíta de gbē kè aṣ kpata blè Yerusalɛmu ma āanɔla n  
pínɡi, ma ɔ̀ndɔ kɔ̀n ma dɔnao wéɛ bò maamaa.

17 Ben ma mè kpà ɔ̀ndɔ asii dɔnaa lɛ mà yɔ̀nkɔkɛ  
kɔ̀n mìsaiyāo asii dɔ, ben má è beee né pɛna guko-  
riamɛ dɔ.

18 ɔ̀ndɔ bíta è mó kɔ̀n nòseyakana bítaome,  
wè yā'ɔ̀amma e n dɔna lémmɛ.

## 2

### *Pɔ̀nnakɛna né yā pāame*

1 Má ò ma zīndanɛ: Ñ fɛɛ n pɔ̀nnakɛna yɔ̀ n gwa n  
nnamana dɔ, ben má è beee né pāame dɔ.

2 Má è kè yáadɔna né yɔ̀nkɔyāme. Pɔ̀nnakɛna sɔ,  
bón wè ea?

3 Ma pɔ̀nnaa wète wēmina guu ma ɔ̀ ligá  
mìsaiyāzi, mode ma swè e dɔome aɛ ɔ̀ndɔɔ guu lɛ  
mà dɔ yā kè maa gbēnteenɛ à kɛ anduna guu a  
wèndi zaka lén.

<sup>4</sup> Ma zĩ bítanɔ ɔɔ kpà, ma kpéno bò ma zĩndane ma geepi líno pèpe kpétekpete.

<sup>5</sup> Ma karanɔ kpàkpa ma swa dàkonɔ kèke ma lí kè wè à né ble bori sãnda píngi bàban.

<sup>6</sup> Ma íkakiino kèke aɔgɔ mɔɔɔ pisi líkpe pìnɔa.

<sup>7</sup> Ma zòno lùlu gɔgbèno kɔn nɔgbèno, wà ní keno ì ma be. Má zùnɔ kɔn pókãde keteno vĩ paripari de gbè kè aɔ kú Yerusalemu ma ãanɔla ní píngi.

<sup>8</sup> Ma kondogi kɔn vurao kàkɔamazi kɔn kínano auzikinɔ kɔn ní bùsu pónɔ. Ma lèsirino sè gɔgbè kɔn nɔgbèno, ma nɔgbè kè gɔgbè è lugańzino sè pari.

<sup>9</sup> Ma tó bò, má bíta de gbè kè aɔ kú Yerusalemu ma ãanɔla ní píngi, ben má kpé ɔndɔɔ vĩ à píngi guu.

<sup>10</sup> Mée gí ma zĩndane kɔn pò kè ma wée blèoro.

Mée pò kè ma pɔɔ gbà ke tóro.

Ma pɔɔ kè nna ma zĩkena píngia, àmbe ma ísimmagaakpana píngi láada ũ.

<sup>11</sup> Kè ma wée tè yã kè má kènɔzi píngi kɔn ísimma kè má gà má kpào à musu, má è à píngi né pãme, pena gukoriamé, à àre vĩ anduna guuro.

<sup>12</sup> Ben ma laasuu tà ɔndɔɔ kɔn yɔnkɔkɛɛo kɔn m̀saikɛɛo kpa.

Yã kè wà kè zaa zii baasiro, à kpareen kína gẽɛbleri é ke ɔɔɔ?

<sup>13</sup> Má è ɔndɔɔ àre vĩ de m̀saikɛɛla lán gupuraa ègɔ àre vĩ de gusiaala nà.

<sup>14</sup> Ɔndɔɔdee wée ègɔ kú a ae, yɔnkɔɔ ègɔ lili oo gusiaan.

Ben má è góro dɔnkɔ bé eé ní bikū ní píngi.

<sup>15</sup> Ben ma laasuu lè ma swèn ma bè, zaake góro dɔnkɔ bé eé wa bikū kɔn yɔnkɔɔno,

bó àren mé e ma òndòòà?

Ben ma bè, beee né yā pāame dɔ.

16 Òndòdee yā é dɔ gbēken de yònkòolaro,

aǎ píngi yā é sǎ gbēnɔn zia.

Òndòdee è ga lán yònkòò bàme.

*Ísimmagaakpana né yā pāame*

17 Ben ma kya kà ma kuunan, zaake yā kè wèe kee anduna guu píngi è keme nòseyakayā ũme. À píngi né pāme, pena gukoria me.

18 Ben ma kya kà zīi kè má kè anduna guunɔn píngi kè mé tó ma gēblerine yānzi.

19 Dé bé à dǔ tó òndòdee ke yònkòon à ũu? Baa kǔn beeeo zīi kè má kè anduna guu kǔn òndòòo é gǔneme. Beee né yā pāame dɔ.

20 Ben ma pɔɔ yàka ísimma kè má gà má kpà anduna guu píngi yā musu.

21 Zaake gbē è zīi ke kǔn òndòòo kǔn dǔnao kǔn gonio, ben è tó gbē kè èe à ke keroone à gǔ à pó ũ. Beee né yā pāame dɔ, nòseyakayāme maamaa.

22 Bón gbē è e ísimma kè à gà à kpà anduna guu kǔn ɔsii kè à kào píngi yā musuu?

23 À kuuna anduna guu gurɔ píngi à zīi ègǔ mɔɔne kǔn yā'ɔammao kǔn pɔyakanaome. Baa gwāavī à làakari ègǔ kpaenaro. Beee né yā pāame dɔ.

24 Yā kè maa kǔn gbēnteeo bé à de à pó ble à í mi à a zī sáabu kpá. Mǎ è beee bò Luda ɔzīme dɔ.

25 Luda dɔnle sai dé bé eé fǔ à pó ble à pɔnnaa kee?

26 Luda è òndǔ kǔn dǔnao kǔn pɔnnaao kpá gbē kè à kènɛa, mɔde è auziki kakǔana zīi da durunkerine le à sí à kpá gbē kè à kènɛa. Beee né yā pāame dɔ, pena gukoria me.

### 3

#### *Yá píngi kǒn a gurɔɔome*

<sup>1</sup> Yá píngi kǒn a gurɔɔome,  
bɔkɔte píngi kǒn a kegurɔɔo.

<sup>2</sup> Né'igurɔɔ kuu, gagurɔɔ kuu,  
pótɔgurɔɔ kuu, à wuregurɔɔ kuu.

<sup>3</sup> Degurɔɔ kuu, gbana aafia gurɔɔ kuu,  
gborogurɔɔ kuu, à dɔgurɔɔ kuu.

<sup>4</sup> Ɔdɔgurɔɔ kuu, yáadɔgurɔɔ kuu,  
sósobikegurɔɔ kuu, kɔkɔ'ogurɔɔ kuu.

<sup>5</sup> Gbèfáakɔana gurɔɔ kuu, gbèkakɔana gurɔɔ kuu,  
bòndagagurɔɔ kuu, à kěna gurɔɔ kuu.

<sup>6</sup> Pówetegurɔɔ kuu, à ɔkpazina gurɔɔ kuu,  
pókúna gurɔɔ kuu, à gbarɛna gurɔɔ kuu.

<sup>7</sup> Pógaakɛgurɔɔ kuu, à nabigurɔɔ kuu,  
lékúna gurɔɔ kuu, yá'ona gurɔɔ kuu.

<sup>8</sup> Yenzi gurɔɔ kuu, zangu gurɔɔ kuu,  
zìkagurɔɔ kuu, kaena aafia gurɔɔ kuu.

<sup>9</sup> Bó àren zĩkeri è e nawěa kè à kèa?

<sup>10</sup> Ma zĩi kè Ludaa dà gběnteenɔne aɔ kee è.

<sup>11</sup> Ludaa tò pó píngi maa a gurɔɔa. À kuuna gurɔ  
píngi laasuu dà gběntee swèn dɔ, baa kǒn beeeo eé  
fɔ à yá kè Luda e kee zaa anduna daena ai à mịdenaa  
gbá dɔro.

<sup>12</sup> Má dɔ kè pókee maa kǒn gběnteeo de kuuna  
pɔnnaa guu kǒn maakɛnao à wěndi lénlaro.

<sup>13</sup> Tó gbě e pó blee èe í mii èe a zĩ píngi sáabu kpaá,  
Luda bé à à gbà.

<sup>14</sup> Má dɔ kè yá kè Luda è kee égɔ kuu gurɔ píngime.  
Weé fɔ wà póke kaaranlo, weé fɔ wà póke lagonlo.  
Ludaa kè ɛ, ɛ wàgɔ a vĩa vĩa yānzime.

15 Pó kè kuu tia gĩake à kuu zaa zi kò. Pó kè eégõ kuu zia kuu yã kò. Luda è yã kè wà kè yãano gbè sísi.

16 Ma yã è anduna guu do,  
guu kè de yãzedeede gõ kún,  
yãzesaidee bé à kú gwe,  
guu kè de yã maaa gõ kún sã,  
yã zaaa bé à kú gwe.

17 Ma bè ma swè guu,  
Luda é yãkpaε ke kõn gbẽ maaano  
kõn gbẽ zaaano ní píngi,  
zaake yãkena píngi kõn a gurɔɔome,  
bɔkõte píngi kõn a kegurɔɔo.

18 Ma bè ma swè guu do, gbẽnteeo sã, Luda è ní yã wée wéine le aɔ dõ ní zĩndaa kè wà de lán nòbɔno bame.

19 Baa zaa zi gbẽnteeo kõn nòbɔno, góro dõnkõ bé è ní bikũu. Lán nòbɔ è ga nà len gbẽntee è ga le se, aɔ wesabona dõnkõme. Gbẽntee de nòbɔlaro, zaake à píngi pãme.

20 Aɔ píngi è gá gu dõnkõmme, zaake aɔ píngi bò búsuti guume, aɔ píngi é eara à gõ búsuti ùme.

21 Tó gbẽntee ninii è tá musu, nòbɔ pó sã è tá gĩzĩme, dé bé à dɔɔ?

22 À yã bé à tò má è yãkee maa kõn gbẽnteeo de à a zĩ sáabu kpálaro, zaake à bakan gwe. Dé bé eé tó à dõ yã kè eé ke à gberaa?

## 4

### *Kuuna kɔo*

1 Ben ma gbãaa kè wèe mɔɔ gbẽnoε anduna guu yã gwà do píngi. Ma gbẽ kè wèe wée tãamano wée'i

è, aõ l àakarikpaeri vïro. Aõ l àakarikpaeri vïro, zaake aõ wéetãmmari pìnò bé wà gbãaa vï.

<sup>2</sup> Ben ma bè, gbē kè aõ gànò sáabu vï de gbē kè aõ kuunola,

<sup>3</sup> mòde gbē kè wèe i kòro bensõ èe wée si à zaaa kè wè ke anduna guuleroo sãómma ń píngi.

<sup>4</sup> Má è kè pò kè tò gbē è zïi ke à mè kpáa, le àgõ de a gbēdaaala yãnzime. Beee né yã pãame do, pena gukoriamε.

<sup>5</sup> Yõnkò è ò kpá a kùla ai à yãyã.

<sup>6</sup> Kuuna kõn pò òkù doo l àakario kpaena maa de kuuna kõn pò òkù plaaao kõn ísimmagaakpanao kõn pena gukoriaola.

<sup>7</sup> Ben ma εara ma yã pã pãnde è anduna guu do.

<sup>8</sup> Gbēke bé à kuu à né vïro, à vïi ke dãaro vïro. À ísimma è yãaro, baa kõn beeeo à auziki è móaro. Dé yãnzin èe zïi keεzi? Bóyãnze à nnamana tè a zĩndanezi? Beee né yã pãame do, yãbòkòte pãsimε.

<sup>9</sup> Plaaa de doola, zaake aõ zĩkena àre égõ maa.

<sup>10</sup> Tó gbē mèn doo lèε, à gbēndoo é à sé.

Wãiyoo gbē mèn do!

Tó à lèε, eégõ sèri vïro.

<sup>11</sup> Tó gõn plaaa daena gu dõnkõn, aõé kõ puusu ma.

Dian gbē mèn doo é ke nà à bò ïan?

<sup>12</sup> Wè gbãa mó gbē mèn doone, gõn plaaano sõ aõè ze wà gíme.

Bà né aagõ è kē kpaaro.

<sup>13</sup> Gõkpare òndõde takaasidee maa de kína zikūna yõnkɔ kè è lédamma ma dɔroola,

<sup>14</sup> baa tó gõkpare pi bò kpésiaa guu, ben à gõ kí ũ, ke tó wà à ì bùsu pìn takaasidee ũ.

<sup>15</sup> Má è anduna tè kína gēbleri gõkpare pìzime.

<sup>16</sup> Gurɔ beeeà à gbēnɔ pari lé vīro, à de ní dɔn'aeɗee ũ. Mɔde gbē kè aõ mò zāanɔ e à sáabu kpáro. Beee né yā pāame dɔ, pɛna gukoriamɛ.

## 5

### *Légbēna Ludanɛ laasuu sai*

<sup>1</sup> Tó n gaa Luda ua guu, ògõ kú kɔn làakario. Ñ sɔzi ñ à yā maa maa de yõnkɔɔnɔ sa'ona gweela, zaake aõ yādñasai bé è tó aõ yā zaaa ke.

<sup>2</sup> N lé tóngõ wāro, ñton wā ñ yā o Ludanero. Lán à kú musu ñ kú tɔɔte nà, ñton yā o pariɔ.

<sup>3</sup> Lán yābɔkɔte parii è mó kɔn nana'onao nà, len yā pari bɔena è mó kɔn yõnkɔyāo le.

<sup>4</sup> Tó n lù sè Ludanɛ, ñton à papana gurɔ gágaro. Ñ à papa, zaake yõnkɔɔnɔ yā è kánero.

<sup>5</sup> Lùsena Ludanɛ sai maa de n lù sène papana saila.

<sup>6</sup> Ñton tó n lé n da yānlo. Ñton o sa'orine n bè n sã lùsena yānlo. Ní yezi Luda pɔ fēnzi n yā pì yānzi à zīi kè nēe keɛ kaaten yó?

<sup>7</sup> Nana pari ona kɔn yā pari bɔenaɔ è mó kɔn yā pāaomɛ. Beee yānzi ògõ Luda vīa vī.

### *Auziki né yā pāame*

<sup>8</sup> Tó ní è wèe gbāa mɔɔ takaasideenɔne gukea, wèe giínne kɔn yāzedeo wèe yā gõgõónne a zéaro, ñton

tó yā pì bɔ n saero, zaake b̀usu pì gbãadeenɔ e ẃeε  
 dɔɔkɔ́nε, ben aɔ gbẽnsinɔ e ẃeε dɔɔ́nε dɔ.

<sup>9</sup> Aɔ píngi è b̀usu pì baka blemε, zaake kína bé à  
 buraanɔ vī.

<sup>10</sup> Gbẽ kè ye ɔɔzi è kēsãa,  
 gbẽ kè ye auzikizi àre è móaro.

Bee né yā pãame dɔ.

<sup>11</sup> Tó auziki e kaara,  
 à blèrinɔ ègɔ kaaramε.

Bó àren à vī a diine?

À ẃeε biia baasiro.

<sup>12</sup> Zĩgbãakeri è i nnaa o,

baa tó à pó blè féte ke bíta.

Auzikidee sɔ pó parii è tó à ii oro.

<sup>13</sup> Ma ǹseyakayã pãsí è anduna guu,

gbẽke zé tàta a ɔɔdaale

à a zĩnda kari kè,

<sup>14</sup> ben à b̀kɔ́te zaaa kèo,

à auziki kàate píngi.

Kè à négɔgbẽ ì, à póke vī kè à tónero.

<sup>15</sup> Gbẽntee è bɔ a da gbεεεn bũumε.

Lán à mò nà len è liara à tá le dɔ,

è a zĩ àre ke e à sé à na a ɔzĩ à táoro.

<sup>16</sup> Yã kèkii né ǹseyakayã pãsíme dɔ.

Lán gbẽ mò nà len è liara à tá le dɔ.

À ísimma gà à kpà à pè gukoria pã,

bó bé à g̀nε?

<sup>17</sup> Beee gbɛra à a gurɔ dè gusiaan

kɔ́n ǹseyakana bítao

kɔ́n gyãao kɔ́n pɔf̃εo.

18 Ben má è à maa kōn gbēnteeo à pò ble à í mi à zīi kè à kè kōn nawēao anduna guu sáabu kpá a wēndi zaka kè Luda à gbà lén, zaake à bakan gwe.

19 Beee gbɛra tó Luda gbē kà ɔɔdaaa kōn auzikio, ben à à gbà zé à aufāni keo, à ze kōn a bakao à a zī sáabu kpá. Luda bé à à gbà.

20 Ègō laasuu lɛɛ a wēndi zakaa pari doro, zaake Luda bé à yā màa kōn ponnaao.

## 6

1 Ma nòseyakayā è anduna guu do kè ɔ tō gbēnteeɔa.

2 Luda gbē kà ɔɔdaaa à à gbà auziki kōn bèeo, à pò kè de àgō à nii deɛ píngi vī, ben Ludaa e à gba zé à aufāni kèoro, gbē pānde bé à gō vī. Beee né yā pāame, nòseyakayā pásīme do.

3 Tó gbē né ì mèn basoro, ben à zi kù kótokoto, baa kōn à gikena, tó èe ponnaa keoro, tó à gà, tó à vīina kpedanaro, ma bè né kè wà ì gè ũu são deàla.

4 Zaake né pì mò pāme, ben à tà gusiaan, à tó gò gusiaan.

5 Baa kè èe ɔfāntē ero bensō à yāke doro, à mè kpaena de auzikidee pila.

6 À de gbē kè kuu wè boro plaa ponnakesaila. Aōè gá gu dōnkō ñ pínginloo?

7 Gbēntee ísimma kè à gà èe kpa, lɛ à pò e à da lén yānzime, mɔde à gbɛɛɛ è karo.

8 Bón òndòdee deo yōnkoolaa?

Bó àren yākɛna a zéa è i takaasideeneɛ?

9 Ponnakɛna kōn pò kè ñ vīio maa de à pānde nidenala.

Beee né yā pāame dɔ, pena gukoriamε.

<sup>10</sup> Pó kè kè yā tó vī kò,

pó kè gbēntee de à ũ sō, wà dō kò.

Gbēntee é fō à leokpakōa ke

kōn gbē kè à gbāaa dealaaoro.

<sup>11</sup> Yābɔena parii è yā yaka.

Bó àren beee vī gbēne?

<sup>12</sup> Dé bé à dō pó kè maa kōn gbēnteeo à wèndi kori zaka kè è gēte lán ɔra bà guuu? Dé bé eé fō à yā kè eé ke à kpεε anduna guu onε?

## 7

### *Ɔndōdanna*

<sup>1</sup> Tó nnaa maa de nōsi gū nna bèedeela, gagurɔɔ maa de igurɔɔla.

<sup>2</sup> Gēna ua kè wèe gè ɔɔ dɔɔn maa de gēna ua kè wèe zībaa keenla, zaake baade píngi yāanan gwe, à maa gbē kè aɔɔ kuunɔ yā pì da.

<sup>3</sup> Sósobikena maa de yáadɔnala, pɔsiakena gberan nòse è wee.

<sup>4</sup> Ɔndōdee làakari ègɔ kú ua kè wèe ɔɔ dɔɔn-a, yōnkɔɔ làakari ègɔ kú ua kè wèe pɔnnaa keen-a.

<sup>5</sup> À maa n ɔndōdee kpākēnzina da de n swā kpá yōnkɔɔ gɔ n tó kpaala,

<sup>6</sup> zaake yōnkɔɔnɔ yáadɔɔ de lán kyàkpa lí tépūtāna kīi guu bàme.

Beee né yā pāame dɔ.

<sup>7</sup> Gbāa mɔna gbēnɔne è tó ɔndōdee yōnkɔ kūme, ɔɔnkpεεgbaa è gbē yakame.

<sup>8</sup> Yā mīdena maa de à daenala,

m̄ena maa de ń zĩnda s̄ena lezĩla.

<sup>9</sup> N̄ton tó ñ p̄o f̄ẽ kpaaro,  
zaake ȳonk̄o bé eḡo p̄of̄ẽ vĩ.

<sup>10</sup> N̄ton be b̄oyānz̄in yāgur̄o maa de tia p̄olaro,  
zaake yālana beee taka né ̄nd̄yānlo.

<sup>11</sup> ̄nd̄o né p̄o maame lán túbi bà,  
à are vĩ gb̄ẽ k̄e āo ̄f̄ant̄ẽ een̄e.

<sup>12</sup> ̄nd̄o né utekiime,  
lán o de utekii ũ n̄a,  
m̄ode d̄ona àren ȳe:

̄nd̄o è gb̄ẽ k̄e āo v̄in̄o w̄endi d̄akpa.

<sup>13</sup> N̄ laasuu lé Luda yākenana.

Dé bé eé f̄o à p̄o k̄e à k̄e kotina d̄o d̄o?

<sup>14</sup> Tó gur̄o nnaa m̄omma, ñ p̄onnaa keo.

Tó gur̄o zaaame s̄o, ñ laasuu lé.

Luda bé à à píngi k̄e,  
le gb̄ẽke tónḡo à ziaa d̄oro yānzi.

<sup>15</sup> Ma w̄endi kori k̄e guu

ma yā k̄en̄o è píngi.

Ma gb̄ẽ maaa è,

à gà a maak̄ena guu,

ma gb̄ẽ zaaa è,

èe gi kee a yāzaak̄ena guu.

<sup>16</sup> N̄ton tó n maak̄ena o ḡero,

ñton tó n ̄nd̄o o ḡero.

À k̄e dia né n zĩnda kaate?

<sup>17</sup> N̄ zaaa tón o ḡero,

ñtonḡo ȳonk̄o ũro.

À k̄e dia né ga n gur̄o āa?

<sup>18</sup> À maa ñḡo yā m̄en plaaa p̄in̄o k̄uname,

ñton o kp̄áziro,

zaake gb̄ẽ k̄e Luda v̄ia v̄i

è à plaaa pìnɔ zé e pínɡime.

19 Ɔndɔ̀ è tó ɔ̀ndɔ̀dee gbāaa gɔ̀ de  
wéte gbāade gɔ̀ɔ̀n kurinɔla.

20 Gbɛ̃ maaa kè ègɔ̀ yā maaa kɛɛ  
kè è durun keroo kú anduna guuro.

21 N̄ton swā kpá yā kè gbɛ̃nɔ̀ e oozi pínɡiro,  
ɛ n̄ton ma n zīkɛri e n s̄s̄ɔ̀ro.

22 Zaake n̄ d̄ɔ̀ n zīndane,  
kè mpi se n gbɛ̃nɔ̀ s̄s̄ɔ̀ pari.

23 Ma yā beeno gwà k̄ɔ̀n ɔ̀ndɔ̀o pínɡi,  
ma zɛo kè mà ɔ̀ndɔ̀ kũ,  
ben à zà kũmao.

24 Baa tó ɔ̀ndɔ̀ f̄ɔ̀ àgɔ̀ dia, à kúkii zà,  
à asii bíta maamaa,  
dé bé eé f̄ɔ̀ à bɔa?

25 Ma ɔ̀ndɔ̀ k̄ɔ̀n yā pínɡio m̄i tàasi kè,  
má gwàgwa ɛ mà e mà d̄ɔ̀,  
ɛ mà yāzaakena d̄ɔ̀ ȳnkɔkɛ ɔ̀,  
ɛ mà ȳnkɔkɛ d̄ɔ̀ m̄isaikɛ ɔ̀.

26 Nɔ̀gbɛ̃ kè de takuteɛ ɔ̀,  
à swè né gbàngidime,  
à ɔ̀ɔ̀n né m̄ɔ̀kyakoomɛ,  
à yā è ma pɔ̀ɔ̀ yaka de gaala.  
Gbɛ̃ kè à yā kà Ludane è pitin,  
m̄ode nɔ̀gbɛ̃ p̄i è durunkɛri kũmɛ.

27 Ma laasuude ma bè,  
n̄ yā kè ma bɔa gwa.

Kè m̄éé yā gwaa zéazea  
ɛ mà e mà à m̄i d̄ɔ̀,

28 gurɔ̀ kè m̄éé weteɛ esai,  
ma ḡɔ̀gbɛ̃ maaa è m̄èn do  
ḡɔ̀ɔ̀n wàa s̄ɔ̀roonɔ̀ té,  
m̄ode baa nɔ̀gbɛ̃ maa m̄èn do

mée e ń téro.

<sup>29</sup> Yá kè ma bɔan yè.

Luda gběnteenɔ kè nòsepuradeenɔ ũme,  
ben aɔ gè mɔnafiki zén.

## 8

<sup>1</sup> Dé bé à de lán òndɔdee bà?

Dé bé à yánɔ bɔkɔtɛna dɔɔ?

Ɔndɔ è gběntee uu werene,

è à wée pāsī lie wée maaa ũ.

<sup>2</sup> Ɔ̀mì sié kína yāne,

zaake n lù sène kɔn Luda tóme.

<sup>3</sup> Ɔnton wā ñ gu à aezīro,

nton ze yā kè è kene zaaa kpεero,

zaake yā kè kène nnaan è ke píngi.

<sup>4</sup> Zaake kína yā bé à zé vī,

dé bé eé fɔ à bene: Bón née kee gwee?

<sup>5</sup> Gbě kè mì siene é gē yānlo,

gbě kè òndɔ è à guro kɔn à kenao dɔ.

<sup>6</sup> Yā píngi a guro kɔn a kenao vīme,

baa tó yá'ɔamma e tɔɔ gběa maamaa.

<sup>7</sup> Zaake gběkee ziaa dɔro,

dé bé eé fɔ à yā kè eé mɔɔ one?

<sup>8</sup> Gběkee a wěndi kūna gbāaa vīro,

leme se gběke é fɔ à a gaguroɔ sɔ aεro.

Wè e wà bò sozan zī guuro,

leme dɔ yā zaaa è a kèrinɔ gbarero.

<sup>9</sup> Kè ma yā kè wèe kee anduna guu laasuu lè píngi,

má è gběntee è gbāaa bleríma à ńa kpánzi.

<sup>10</sup> Ben ma zaakeri kè wèe ń vīnɔ è. Gbēnɔ bò Luda

ua guu aɔ mò ń tó nnaa sí wéte kè aɔ ń yā zaaa kèn  
guu. Beee né yā pāame dɔ.

11 Tó wèe ãa da dàkèria kpakpaaro, à yã è tó gbẽno zεo ñ swèn wà à zaaa kεmε se.

12 Baa tó durunkeri dà kè gèn baaagõ, ben à gí kè, má dõ kè gbẽ kè aõ Luda vĩa vĩ bensõ aõεe mì siεεnεno são dεàla.

13 Yã é bõ zaakεrinõ nnaro kè aõ Luda vĩa vĩro yãnzì, aõ gurõ é gí kero lán ora bàme.

14 Yã pã pãndee kuu èe kεε anduna guu. Yã è gbẽ maa le lándõ zaakεrin à ùu bà, yã è zaakεri le lándõ gbẽ maaan à ùu bà. Ma bè beee né yã pãame dõ.

15 Mèè ponnakena sáabu kpá, zaakε à maa kõn gbẽnteeo anduna guu à pó ble à í mì à ponnaa ke, ponnaa pì é dõne aε à zíkεna guu lán Luda à gbà à wèndi lén nà anduna guu.

16 Ma mè kpà òndõkūnaa, ben bokõte kè wèe kεε anduna guu kè ii è na ñ wéenlo fãantë kõn gwãavĩo, ma à laasuu lè

17 má è Ludaa tò gbẽke é fõ à yã kè èe kεε anduna guu dõro. Baa tó gbẽ kpáε kèzi maamaa, eé à mì dõro. Baa tó òndõdee bè á dõ, eé fõ à bõaro.

## 9

### *Yã dõnkõ bé èe baade píngi dāa*

1 Ma beeenõ laasuu lè píngi, ben ma zεo kè gbẽ maaanõ kõn òndõrinõ kõn ñ yãkenanõ kú Luda oĩmε. Gbẽke ègõ dõ tó yenzi ke zangu e a dāaro.

2 Yã dõnkõ bé èe baade píngi dāa, yãpuradeenõ kõn nòεpāsīdeenõ, gbẽ maaanõ kõn gbẽ zaaanõ, gbāsīsaideenõ kõn gbāsīdeenõ, ludagbāgbārinõ kõn ludagbāgbārisainõ. Lán à dε kõn gbẽ maaanõ nà, len à dε lε kõn durunkerinõ. Lán à dε nà kõn gbẽ kè aõè la daanõ, len à dε lε kõn gbẽ kè aõè la daroonõ.

<sup>3</sup> Yā kè è ke anduna guu píngi nòseyakayāme, kè yā dōnkō bé è gbē píngi le. Yā zaaa kò gbēnteenō swēn, yōnkoyā bé è dōñne ae, à gbera aōè tá gèwāan.

<sup>4</sup> Gurō kè gbē kú wèndio ègō tāmaa vī. Gbēe kè bēe see são de músu gèla.

<sup>5</sup> Gbē bēenō dō kè aōé ga, gèno sō pòke dōro. Aō láada ke vī dōro, aō yā é dō gbēken dōro.

<sup>6</sup> Aō yena gbēzi kōn n zana gbēn-o kōn n nòsegōaanō gè zélan gwe. Aō bà égō kú kōn yā kè è ke anduna guuo ziki dōro.

<sup>7</sup> N̄ gá n̄ n pò ble kōn pōnnaao, n̄ n geepiwēe mi kōn yāadōnao, zaake Luda n yākēna pīno sáabu kpà kò.

<sup>8</sup> N̄gō uta puraa dana gurō píngi. N̄tongō kuu n̄sí dōkōna n mīa sairo.

<sup>9</sup> N̄ pōnnaa ke kōn n naō yenzideeo n wèndi kori kè Ludaa kpàmma anduna guu lén, zaake n bakan gwe gurō kè n ísimma gà née kpaa anduna guu.

<sup>10</sup> Zīi kè n̄ n̄ a kenaa, n̄ ke n gbāa lén, zaake zīi ke yāgōgōna ke dōna ke òndō kú gèwāan kè née taanlo.

<sup>11</sup> Má è anduna guu dō kè  
 bàkpakōsōblena è ke bà nna yānlo,  
 zīblena è ke gbāa yānlo,  
 pòble'ena è ke òndō yānlo,  
 auziki'ena è ke wéézē yānlo,  
 nna kōn gbēno è ke kyódōna yānlo,  
 zaake gurō zaa kōn kisiao è n̄ lé n̄ píngi,  
<sup>12</sup> gbēkee gurō kè yā zaaa é a lee dōro.  
 Lán kpò kè s̄i táaru guu bà,  
 lán bāa kè bà kù bà,  
 len guu è dō gbēne zaazaa à à kù kùsu le.

*Ɔndɔ de gbāaala*

<sup>13</sup> Ma Ɔndɔ ke taka è anduna guu, à yā ma kũ gbāa.

<sup>14</sup> Lakutu kee kuu yā, à gbɛnɔɔ pariro, ben kína gbāadee mò à lèea à lîga à bīzi.

<sup>15</sup> Gɔgbɛ takaaside Ɔndɔde kee kú lakutu pì guu, à lakutu mì sî kɔn a Ɔndɔɔ, ben takaasidee pì yā e dɔ gbɛkenlo.

<sup>16</sup> Ben ma bè Ɔndɔ de gbāaala, mɔde wè kya ká takaaside Ɔndɔn, wè à yā daro.

<sup>17</sup> Ɔndɔdee yā yīiyīi kè wà swā kpàzi maa de yɔnkɔɔnɔ kí patammanala.

<sup>18</sup> Ɔndɔ maa de gɔkɛbɔnɔla, mɔde durunkɛri mèn doo è yā maa bíta yakamɛ.

**10***Yɔnkɔke kari*

<sup>1</sup> Lán ifī gèno è tó tuaekɛri nósi gūu zaa kũ nà, len yɔnkɔke féte è gbɛ kè Ɔndɔ vī kɔn bèeo tó yaka lɛ.

<sup>2</sup> Ɔndɔdee laasuu è tá ɔplazi, yɔnkɔɔ pɔ è tá ɔzezi.

<sup>3</sup> Baa tó yɔnkɔɔ e táa oo zén, à Ɔndɔ ègɔ kɛsāname, è tó baade píngi a mīsaikɛɛ dɔ.

<sup>4</sup> Tó gbāadee pɔ fɛnzi, ñton gu n tílaro.

Kuuna n làakaria è lá ká taari bítala.

<sup>5</sup> Ma nɔseyakayā ke è anduna guu, à de gbāade sāsāna yāa ūmɛ.

<sup>6</sup> Wè yɔnkɔɔnɔ ká gwena maaan pari, auzikideenɔ sɔ ègɔ kú gwena kɛsānan.

<sup>7</sup> Ma zònɔ è di sɔa,

wēeneno sōo e táa oo kèse lán zòno bà.

<sup>8</sup> Gbē kè èe wēe yōo é zu à guu,

gbē kè èe bīi gboroo, mlè é à só.

<sup>9</sup> Gbē kè èe gbè wii, gbè é à kēnna,

gbē kè èe yàka paraa, yàka é à kari ke.

<sup>10</sup> Tó kpása lé nnaro,

ben wèe à lé kekero,

sé n̄ gāsāwa bōbōzi kōn gbāaa,

m̄de ɔ̄ndōo è tó wà à zé eme.

<sup>11</sup> Tó mlè bōn'āa kè a kōkō'orine à à sò,

à àre vī à guu dōro.

<sup>12</sup> ɔ̄ndōdee légbē nna,

m̄de yōnkōo lé è à kaateme.

<sup>13</sup> È na yā'onaa yōnkōyōnkō,

è à mì de kōn m̄saiyā zaaao,

<sup>14</sup> zaake yōnkōo è yā bōeme.

Lán gbēke yā kè eé mó dōro nà,

dé bé eé f̄o à yā kè eé ke à kpeε onε?

<sup>15</sup> Yōnkōo zīi è à kpasame,

ai se è zé dō gana wéte guuro.

<sup>16</sup> Wāiyoo b̄usu kè à kína de gōkpare ũ,

à ìbano ègō p̄o gbēε zaa gudōnao.

<sup>17</sup> M̄nnadeen b̄usu kè à kína de kine ũ,

à ìbano è p̄o ble à gurōoa gbāakaarana yānzi,

èe ke wēdena yānzinlo.

<sup>18</sup> Tó gbē m̄ea vī,

à kpé líkōkūno ègō zunname,

tó èe gwaa wéεo,

à kpé é í bō.

<sup>19</sup> Wè p̄oble bíta ke p̄onnakena yānzime,

wēmina è mó kōn yáadōo,

m̄de ōo bé è mó kōn à píngio.

20 Ñton kína s̄s̄s̄ro, baa n n̄s̄e guu,  
 ñton auzikide káro, baa n kpé guu,  
 zaake b̄aa é yā p̄i s̄e à gá ōñeme.

## 11

1 Ñ gba da p̄obleeo gb̄en̄ne,  
 z̄īkea né e d̄o.

2 Ñ kpaatete ḡōn sw̄eplaaan̄ne ke s̄oraaḡō,  
 zaake n̄ m̄onzi k̄e eé b̄usu lee d̄ōro.

3 Tó ludambe sia k̄u k̄ōn ío,  
 è ma t̄ōtea lou ūme,  
 tó lí l̄e ɔ̄f̄ant̄eb̄e kpa ke ɔ̄f̄ant̄eḡkpen kpa,  
 guu k̄e à l̄en, gwen èḡō daeen.

4 Gb̄e k̄e à w̄e d̄o ĩazi è p̄o t̄ōro,  
 gb̄e k̄e èe ludambe siaa gwaa è p̄o k̄ero.

5 Lán n̄ w̄endib̄kii d̄ōro nà  
 ke né kasana a da gb̄een,  
 né f̄ō n̄ Luda P̄ópingikeri z̄ī d̄ōro.

6 Ñ p̄o t̄ō k̄onḡo,  
 ñton mēa ke uusiero,  
 zaake n̄ d̄ō tó à kparee bé eé aubarika kero.  
 K̄ekiin yoo ke k̄ek̄aan yoo,  
 ke āéḡō maa n̄ p̄inḡin yoo, n̄ d̄ōro.

7 Gupura nna,  
 w̄eesina ɔ̄f̄ant̄ēle è k̄áñne.

8 Baa tó gb̄e w̄endi gb̄aa f̄ō àḡō dia,  
 à p̄onnaa ken p̄ingi.  
 Baa k̄ōn beeeo à laasuu lé gusia gur̄ōa,  
 zaake āéḡō parime.  
 Yā k̄e èe m̄ō p̄ingi p̄āme.

### *Lédana ḡōkparēn̄a*

9 Ḡōkpare, n̄ p̄onnaa ke n̄ òwazikegur̄o,  
 n̄ tó n̄ p̄ōo ke nna n̄ ḡōkparekegur̄ōa.

Ñ yã kè n pɔɔ gbà ke  
 ñ té pɔ kè kènnεεzi,  
 mɔde à píngi guu ñgɔ dɔ  
 kè Luda é yákpae kenyo.

<sup>10</sup> Ñton tó n pɔɔ yakaro,  
 ñ n mɛ'ɔammanɔ gonla,  
 zaake gɔkpareke kɔn mikã siaao è gɛ zélame.

## 12

<sup>1</sup> Ñ tó n Kèri yã gɔ dɔngu n gɔkparekeguro  
 ai guro zaaa gá ká,

ai wɛ̀ kè né be néé à nnaa ma dɔrooa.

<sup>2</sup> Ñ tó à yã gɔ dɔngu

ai ɔfántɛ kɔn gupuraaɔ gɔ lago,

ai mɔvura kɔn sɔsɔnɛnɔ gɔ sia kũ,

ai loumana gbɛra guweresai gɔ gá su.

<sup>3</sup> Guro beea n ɔɔnɔ é gɔ lugaluga,

n gbánɔ é koko,

n pɔsobɔnɔ é kámma bo kè aɔɔ pari dɔro yãzi,

n gugwabɔnɔ é guu e n wíndo guu dãadãa.

<sup>4</sup> Ñ lé é gɔ nakɔana gãale,

wísilɔgbɛ kĩ é buse kũnnɛ.

Bãanɔ wiii é n vu iin,

nɔkparenɔ lè é kenne buse.

<sup>5</sup> Né vĩa ke gulezĩne kɔn lili'ona zé guuo,

n mikã é pura kũ lán desu vú bà.

Né n zĩnda gáe lán kwa táa'ona bà,

póke é n mɛ fεε dɔro,

zaake gbɛntee è gá a gákiiame,

ben ɔɔdɔrinɔ è gɔ lili oo gãale.

<sup>6</sup> Ñ tó n Kèri yã gɔ dɔngu

ai n kondogi bà gɔ gá kɛ,

ai n vura taa gõ gá kpaato kũ,  
 ai n í loo gõ gá wíwi,  
 ai n lògɔ googa gõ gá wí,  
 7 ai n bùsuti gõ ɛara à gá gẽ tɔtɛn,  
 guu kè à bòn,  
 ai n ninii gõ gá tá  
 Luda kè kpàmmaa kiia.  
 8 Ma laasuude ma bè:  
 Yā pā búgubugu,  
 à píngi pāme.

*Yā pì mǐdena*

9 Beee gbera lán laasuudee pì òndõ nà, à dõna dàdańe. À laasuu lè à kpáe kè yāzi, ben à yáasinɔ kè pari.

10 À kpáe kè yā maaazi, ben à yā pìnɔ kè a zéa, bensõ yāpurame.

11 Òndõdee yānɔ de  
 lán gò kè wè pókádeenɔ zõ bàme,  
 aõ yā'onanɔ de  
 lán kuusa kè wà pà gínginno bà.  
 Sādāri mèn doo bé à yā pìnɔ dà.

12 Ma né, ò làakari ke, ònton yāke kaaranlo. Wè takadanɔ kè paripari, à lé vīro. Kyókēna bíta sō è mè kpasame.

13 Wà à píngi mà, à mǐdenan yè:

Ñ vīa ke Ludane,  
 ñgõ à yādiēnanɔ kūna,  
 zaake baade píngi yān gwe.

14 Luda é yākpae ke wa yā píngi musu,  
 kōn yā kè utēnao píngi,  
 baa à maa ke à zaa.

**Luda yá takada kǝn Bokobaru yáó**  
**The New Testament and portions of the Old Testament**  
**in the Bokobaru language of Nigeria**

copyright © 2005 SIM International

Language: Bokobaru

Translation by: SIM

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-09-22

---

PDF generated using Haiola and XeLaTeX on 18 Apr 2025 from source files dated 31 Aug 2023

c31548a1-5316-53c2-be42-674e0e4c5ae5